

IV. TITULUA

ERRESERBEN ARAUDIA

39. artikulua.—Kirol-instalazioak alokatzea

Kirol-instalazioak alokatzeko zerbitzua erabiltzaileen esku dago. Hortik erreserba-mota guztiak zentralizatzen dira, eta Orozkoko Udalak onetsitako prezioak kobratzen dira, osagarriei dagozkienak barne, hala nola, argia, aldagelak, etab., baldin eta erabiltzaileek eskatzen badute.

Prezioen zenbatekoa jokalekua/orduko gisa zenbatuko da; praktikatuko den espezialitateak zehaztuko du prezioa.

40. artikulua.—Erreserben mugak

Orozkoko Udalak, dagoen eskaria kontuan hartuta, erabiltzaile eta aste bakoitzeko erreserba litekeen gehienezko ordu-kopurua mugatu ahal izango du.

41. artikulua.—Orozkoko Udalak egindako erreserbak

Orozkoko Udalak, aurrerapen nahikoaz, Udalak berak erreserbatutako egunen berri emango du, eta egun horietan ezin izango dira erreserbak egin.

42. artikulua.—Erreserba aldatzea edo ezeztatzea

Jokalekuak, kirol pistak edo erabili beharreko materiala egoera txarrean daudenean eta ondorioz edozein kirol egitea ezinezkoa edo arriskutsua denean, erabiltzaileak aukeratutako erreserba ordua aldatu ahal izango da, erabiltzailea ados baldin badago. Bestela, erabiltzaileak egindako erreserba galduko du, eta ordaindutako prezioa atzera eskuratzeko eskubidea izango du.

43. artikulua.—Erreserbak egiteko lekua eta baldintzak

Instalazioak udal kirol-instalazioetako administrazio-bulegoetan egin beharko ditu interesdunak, erreserba horiei dagozkien kuotak ordainduta.

Erabiltzaile bakoitzak —harpideduna nahiz harpidetu gabea izan— gehienez ere kirol pista edo jokaleku bat astean ordu betez erreserbatu ahal izango du, non eta zerbitzuak ez duen erabilera handiagoa egiteko aukera ematen.

44. artikulua.—Finkatutako kuoten ordainketa

Finkatutako kuotak erabilpen kontzeptuan ordainduko dira, erreserba egiten den unean bertan; hala ere, Orozkoko Udalak erreserbak ordaintzeko beste sistema berezi bat ezar dezake instalazio jakin batzuetarako.

Erreserbatutako instalazioa ez erabiltzeak ez du salbuesten instalazio horretarako ezarritako tasa ordaintzetik, aldez aurretik 24 orduko aurrerapenagaz jakinarazi ez bada.

45. artikulua.—Kirol-instalazioa erabiltzen jarraitzeko aukera

Erabiltzaileei kirol pista edo jokalekua erabiltzeko ordua amaitzen zaionean, kirola egiten jarraitu nahi badu oraindik ere, jokaleku hori edo beste bat libre baldin bada erabiltzeko aukera izango du, ezarritako prezioa ordaindu ondoren.

46. artikulua.—Kirol klub, elkarte eta federazioentzako erreserbak

Salbuespen gisa, kirol klub, elkarte eta federazioentzako instalazio- erreserbak beharrezkoa den aurrerapenaz egingo dira, zerbitzuen araudi honen 28 artikuluan jasotzen den araudiaren arabera.

Erreserba egun eta orduak gainerako talde eta banakako erabiltzaileen beharren arabera ezarriko dira.

Erreserba talde-kirol baterako denean, jardueran parte hartzen duten guztiek parte-hartzaileen gehiengoa harpidedun edo harpidetu gabea izatearen arabera ezarritako prezioa ordaindu beharko dute.

47. artikulua.—Norbere harpidedun-txartela erabiltzeko betebeharra

Ezin izango dira erreserbak beste baten harpidedun-txartelaz egin.

48. artikulua.—Erreserben sailkapena

Kirol-instalazioak erabiltzeko honako erreserba-mota hauek ezartzen dira mailaren arabera:

a) Harpidedunentzat:

1. Edozein kirol-instalazio edo jokaleku erreserbatu ahal izango dute erreserbarako aurreikusitako eguna baino zazpi egun eta ordu erdi lehenago, gehienez ere. Nolanahi ere, jokalekua edo pista libre baldin badago, jarduerari ekin aurreko orduan ere egin ahal izango da erreserba.

2. Eskatzen duten bakoitzean pertsona bakoitzeko erreserba bat egingo da, eta berriz ere ilararen hasiera itzuli beharko da, ilararik badago.

3. Erreserba baimendutako pertsonaren bitartez egin ahal izango da, baimen hori egiaztatzen duen agiria aurkeztuz harpidedun txartelarekin eta bere NANekin etab.ekin batera (edo horren fotokopia).

Baimenaren egiaztagirian erreserbatu nahi den eguna, ordua, instalazioa eta ordaindu beharreko prezioa jasoko dira; soilik eguna eta ordua aldatu ahal izango dira, nahi den ordua dagoeneko erreserbatuta baldin badago.

Nolanahi ere, harpidedun diren erabiltzaileek egindako erreserbek izango dute lehentasuna.

b) Harpidedun ez direnentzat:

1. Nahi duten instalazioa erreserbatu ahal izango dute gehienez ere egun bateko aurrerapenaz; instalazioa libre baldin badago, dena den, kirolari ekin baino ordubete lehenago erreserbatu ahal izango dute.

2. Klub, elkarte eta federazioentzat egindako erreserba, denboraldiaren hasieran zehaztutako aldietatik aparte, zazpi eguneko aurrerapenaz egin ahal izango da.

Erreserba horiek egingo den jarduera zehaztuko dute, lege baldintza hori egiaztatzen duen agiria aurkeztuz.

c) Itundutako taldeentzat:

1. Modalitate honentzako eskabideak urriaren 1etik hurrengo urteko ekainaren 30 arteko aldirako bideratuko dira.
2. Erreserba-modalitate honen araudi-garapena urtero zehaztuko da, araudi honen osagarri den berariazko dokumentu batean.